

# Convenio entre a Consellería de Cultura, Educación, Formación Profesional e Universidades e o Cluster del Granito sobre a colaboración educativa nas ensinanzas de formación profesional

Santiago de Compostela,

**01 XUÑ. 2022**

## REUNIDOS

Dunha parte, don Román Rodríguez González, conselleiro de Cultura, Educación, Formación Profesional e Universidades da Xunta de Galicia, en representación desta consellería, e de conformidade coas atribucións conferidas no artigo 34.1 da Lei 1/1983, do 22 de febreiro, de normas reguladoras da Xunta e da súa Presidencia e no Decreto 60/2022, do 15 de maio, polo que se nomean os titulares das vicepresidencias e consellerías da Xunta de Galicia.

Doutra, don Javier Blanco Silva, Presidente do Cluster del Granito, por acordo da Asemblea Xeral de 8 de setembro de 2017.

Interveñen en función dos seus respectivos cargos e en exercicio das facultades que para convir, en nome das entidades que representan, teñen conferidas.

## EXPOÑEN

1. Que a Lei Orgánica 2/2006, de 3 de maio, de Educación, determina no artigo 39 que a formación profesional, no sistema educativo, ten por finalidade preparar aos alumnos e as alumnas para a actividade nun campo profesional e facilitar a súa adaptación as modificacións laborais que poidan producirse ao longo da súa vida, así como contribuír ao seu desenvolvemento persoal e ao exercicio dunha cidadanía democrática

Igualmente, contempla no apartado 2 do artigo 42, que o currículo das ensinanzas de formación profesional incluíra unha fase de formación práctica nos centros de traballo, da que poderán quedar exentos os que acrediten unha experiencia laboral que se corresponda cos estudos profesionais cursados.

2. Que o Decreto 114/2010, do 1 de xullo, polo que se establece a ordenación xeral da formación profesional do sistema educativo de Galicia, na súa disposición adicional segunda, contempla a relación coas empresas nos seguintes aspectos:

- a) A consellería con competencias en materia de educación promoverá a colaboración coas empresas e entidades empresarias e, en particular, coas máis implicadas en sectores clave da economía galega e as relacionadas cos sectores emerxentes.
- b) Esta colaboración ten a seguinte finalidade:
  - Realización do módulo de formación en centros de traballo.
  - Impartición de módulos profesionais incluídos en títulos de formación profesional ou módulos formativos incluídos en certificados de profesionalidade nas instalacións das empresas, co fin de garantir que a formación se realice cos equipamentos máis actuais.
  - Actualización profesional dos traballadores e as traballadoras, así como do profesorado. Esta formación poderá incluír estadias temporais do profesorado nas empresas, tanto para a formación dos seus traballadores e das súas traballadoras como para a actualización do profesorado.
  - A validación das accións de formación desenvolvidas nas empresas, de acordo cos requisitos que se establezan, co fin de lles facilitar aos seus traballadores e ás súas traballadoras a obtención dun título de formación profesional.
  - Desenvolvemento conxunto de proxectos de innovación

c) A colaboración formalizarase mediante convenio.

Así mesmo, recolle no seu artigo 19 que as ofertas de accións formativas de formación profesional irán dirixidas á adquisición e á mellora das competencias e das cualificacións profesionais, promoverán a formación permanente e organizaranse en ciclos formativos e en cursos para unha maior especialización ou formación específica para determinados colectivos, co fin de que as persoas avancen no seu itinerario de formación profesional independentemente da súa situación en cada momento.

3. A Resolución do 21 de xuño de 2021, da Secretaría Xeral de Educación e Formación Profesional, pola que se ditan instrucións para o desenvolvemento dos cursos de especialización de formación profesional no ano académico 2021/22 no ámbito da Comunidade Autónoma de Galicia, establece que terán por obxecto completar as competencias daquelas persoas que dispoñan dun título profesional de referencia e incorporar na formación do alumnado as últimas innovacións do sistema produtivo, nomeadamente dos ámbitos emerxentes.

Dadas as especiais características dos cursos de especialización, a súa alta especialización, a incorporación no seu currículo de competencias de sectores produtivos emerxentes, a Consellería de Cultura, Educación, Formación Profesional e Universidades ten en marcha un plan global para o desenvolvemento dos cursos de especialización fundamentado na participación activa dos profesionais dos sectores produtivos, os clúster, as asociacións, os centros de investigación etc. na formación e capacitación do profesorado, na formación do alumnado e na cesión de equipamento e/ou instalacións. Este plan ten como finalidade última garantir a mellor formación e capacitación do alumnado, un alto coñecemento do sector e unha óptima inserción profesional.

4. Que o Cluster del Granito é unha asociación sen ánimo de lucro que ten por fin representar ao sector empresarial do granito, aos seus asociados, defender os seus intereses e as actividades afíns ao largo da cadea de valor do granito.

5. Que a Consellería de Cultura, Educación, Formación Profesional e Universidades e o Cluster del Granito están dispostos a colaborar en todos aqueles aspectos que melloren as competencias do alumnado de formación profesional e se adapten ás actuais necesidades formativas do mercado laboral e así conduzan a unha óptima inserción laboral deste alumnado.

En consecuencia, ambas as partes acordan asinar este convenio, que se rexerá polas seguintes,

### CLÁUSULAS

**Primeira.** O presente convenio ten por obxecto establecer a colaboración no eido da formación profesional entre a Consellería de Cultura, Educación, Formación Profesional e Universidades e o Cluster del Granito. Esta colaboración levarase a cabo nos seguintes campos de actuación:

- a. Colaboración nos cursos de especialización de formación profesional xa sexa a través da formación e capacitación do profesorado, na formación do alumnado e/ou na cesión de equipamento e/ou instalacións.
- b. Promover entre as empresas o desenvolvemento de proxectos de innovación tecnolóxica ou científica e proxectos de innovación didáctica no ámbito da formación profesional nos centros públicos dependentes da Consellería de Cultura, Educación, Formación Profesional e Universidades.
- c. Impulsar que as empresas participen no programa de formación en centros de traballo (FCT), para o alumnado que curse formación profesional.
- d. Orientación na formación e actualización do profesorado dependente da Consellería de Cultura, Educación, Formación Profesional e Universidades.
- e. Fomentar a obtención de titulacións de formación profesional e certificados de profesionalidade por parte dos traballadores e das traballadoras das empresas galegas, dentro do Plan de avaliación, recoñecemento e acreditación (ARA) da experiencia profesional que desenvolve a Consellería de Cultura, Educación, Formación Profesional e Universidades.

- f. Impulsar un sistema de formación dual entendida como un conxunto de accións e iniciativas formativas, mixtas de emprego e formación, que teñen por obxecto a cualificación profesional do alumnado nun réxime de alternancia de actividade laboral nas empresas, que favoreza e complemente a adquisición das competencias profesionais do alumnado, coa actividade formativa recibida no centro educativo.
- g. Promover o apoio mutuo centro-empresas, especialmente entre as pequenas e medianas empresas e os centros educativos, que impartan ensinanzas de formación profesional.

### **Segunda. Cursos de especialización de formación profesional**

Os cursos de especialización deben responder de forma rápida ás innovacións que se produzan no sistema produtivo e a ámbitos emerxentes, coa creación dos perfís profesionais demandados polos sectores emerxentes como Big Data, intelixencia artificial, desenvolvemento sostible, industria intelixente, robótica ou 3D, entre outros. Neste sentido, estes cursos complementan a formación incluída nos títulos de referencia que permiten aos titulados mellorar as súas competencias e adquirir outras novas en ámbitos moi especializados e concretos das súas respectivas familias profesionais.

Na nosa Comunidade Autónoma impártense trece cursos de especialización, o Cluster del Granito colaborará, dentro das súas posibilidades, na formación e capacitación do profesorado que imparta estes cursos, na formación do alumnado e na cesión de equipamento e/ou instalacións.

### **Terceira. Desenvolvemento de proxectos de innovación**

Os centros de FP teñen a responsabilidade de fomentar a realización de proxectos nas súas aulas que potencien o desenvolvemento e a mellora dos procesos tecnolóxicos, metodolóxicos e formativos e potencien a colaboración co mundo empresarial. Estes proxectos deberán evolucionar cara a sistemas de traballo que integren a innovación didáctica e tecnolóxica nos ensinamentos de Formación Profesional e poñan en contacto permanente a centros educativos co tecido empresarial da súa contorna, así como, como con organizacións e entidades co mesmo interese científico dentro dunha cultura colaborativa.

Neste sentido e dentro das iniciativas de innovación da Consellería de Cultura, Educación, Formación Profesional e Universidades promoveranse as actuacións conxuntas co Cluster del Granito tanto no desenvolvemento de proxectos de innovación nos centros educativos de formación profesional como calquera outra iniciativa que potencie a transferencia de coñecemento, buscando a calidade e a excelencia na formación profesional.

#### **Cuarta. Programa de formación en centros de traballo**

O Cluster del Granito promoverá que as empresas acollan alumnado que estea cursando formación profesional para a realización do módulo de FCT, e canalizará as demandas das empresas ben ata os centros educativos atendendo ás especialidades, ou ben cara ao servizo ou unidade administrativa que designe a Consellería de Cultura, Educación, Formación Profesional e Universidades, que se encargará da derivación aos centros educativos.

Cada centro de traballo responsabilizarase da formación do alumnado, para o que designará aos/ás titores/as responsables de cada área formativa. O centro educativo tamén designará un/ha titor/a ou titores/as que colaborarán co/a titor/a da empresa na elaboración do programa formativo e no apoio técnico ao alumnado.

Cada alumno/a asistirá ao centro de traballo provisto da súa tarxeta de identificación ou D.N.I., e observará as normas do centro de traballo no tocante á puntualidade, asistencia e comportamento. A empresa poderá desistir libremente de continuar a colaboración formativa, respecto de calquera alumno/a, por incumprimento das normas, abondando para iso unha comunicación escrita ao centro escolar, oído previamente o/a titor/a do/a mesmo/a. O/A alumno/a non terá en ningún caso vinculación laboral coa empresa, non podendo establecerse entre esta e aquel/a ningunha relación contractual, nin sequera baixo as modalidades de contratos formativos, previstos no artigo 11 do Real decreto lexislativo 2/2015, do 23 de outubro, polo que se aproba o texto refundido da Lei do Estatuto dos Traballadores, polo que o alumnado acollido a este convenio queda absolutamente excluído da lexislación laboral. Durante o período de prácticas concertado non se poderá formalizar ningunha modalidade de contrato de traballo entre a empresa e o/a alumno/a, mentres non se revoque expresamente o convenio de colaboración formativa entre o centro educativo e a empresa, respecto dese/a alumno/a.

Os riscos por accidentes de traballo derivados da realización das prácticas, tanto se afectan ás cousas ou a terceiros coma ao propio alumnado, incluídos os constitutivos de invalidez ou determinantes de morte, quedan cubertos por unha póliza de seguro colectivo adicional de carácter civil que ten subscrita a Consellería de Cultura, Educación, Formación Profesional e Universidades.

#### **Quinta. Formación e actualización do profesorado**

Á proposta dunha das partes implicadas poderanse organizar cursos, seminarios, estudos, etc., sobre temas referentes ás novas tecnoloxías de común interese, tanto para persoal específico das empresas pertencentes ao Cluster del Granito, dentro das súas posibilidades, como da Consellería de Cultura, Educación, Formación Profesional e Universidades.

Para tal fin, o Cluster del Granito colaborará, mediante o oportuno apoio técnico e loxístico, no programa de formación do profesorado e máis concretamente nas estancias en empresas por tempo definido, para o profesorado de formación profesional e segundo as necesidades de formación, previstas na convocatoria de estadías en empresas que anualmente promove a Consellería de Cultura, Educación, Formación Profesional e Universidades. Así como tamén, colaborará na formación e actualización do profesorado naquelas técnicas e tecnoloxías que considere de interese.

#### **Sexta. Recoñecemento da experiencia laboral dos/as traballadores/as das empresas pertencentes ao Cluster del Granito**

Dentro do Plan de avaliación, recoñecemento e acreditación (ARA) da experiencia profesional, a Consellería de Cultura, Educación, Formación Profesional e Universidades analizará co Cluster del Granito a posibilidade de acreditar a experiencia profesional dos/as traballadores/as das empresas e convocar aquelas cualificacións profesionais vinculadas a determinados postos de traballo.

#### **Sétima. Impulso ao sistema de formación profesional dual**

O Cluster del Granito continuará co impulso da formación profesional dual co obxecto da cualificación profesional do alumnado nun réxime de alternancia de actividade laboral na

empresa, que favoreza e complemente a adquisición das competencias profesionais do alumnado, coa actividade formativa recibida no centro educativo. Neste sentido, valorará as posibilidades de poñer en funcionamento proxectos de formación dual, que se formalizará coa firma dun convenio específico, ou ofertar prazas de FP Dual de segundo curso.

#### **Oitava. Apoio mutuo centro-empresas**

A través do Cluster del Granito fomentarse o apoio mutuo entre as empresas, especialmente as pequenas e medianas, e os centros educativos, que impartan ensinanzas de formación profesional, en todos aqueles aspectos de interese para as partes, entre eles:

- a. Cursos de formación para o profesorado e os profesionais do sector.
- b. Colaboración coas empresas para o desenvolvemento de proxectos de innovación.
- c. Asistencia técnica ás empresas, resolución das problemáticas técnicas sobre creación ou modificación de prototipos ou produtos que melloren a competitividade das empresas.
- d. Participación das empresas nas iniciativas, con presenza empresarial, que se poñan en marcha dentro do catálogo de servizos da rede de centros integrados de formación profesional.

#### **Novena. Comisión de seguimento**

Establecerase unha comisión de seguimento, control e supervisión, que se reunirá cando se considere oportuno por calquera das partes asinantes.

Esta comisión estará constituída por:

- Dúas persoas representantes da Consellería de Cultura, Educación, Formación Profesional e Universidades, unha das cales exercerá a presidencia da comisión.
- Dúas persoas representantes do Cluster del Granito.
- Unha persoa funcionaria da Consellería de Cultura, Educación, Formación Profesional e Universidades que actuará como secretaria.

As súas funcións serán as seguintes:

- Efectuar o seguimento e avaliación do convenio.

- Estudar as liñas de colaboración para adecuar o deseño e actualización das ensinanzas de formación profesional ás demandas do sector produtivo.
- Propoñer as addendas necesarias para o desenvolvemento das actuacións previstas no Convenio marco, que incluírán a calendarización e recursos asignados para as distintas actividades, así como as modificacións do convenio que se xulguen necesarias, especialmente as orientadas á realización doutras accións.
- Resolver as cuestións, dúbidas e discrepancias que podan aparecer na execución das actuacións, e que algunha das partes eleve a comisión.

#### **Décima. Vixencia do convenio**

O convenio entrará en vigor na data da súa sinatura e terá unha vixencia de catro anos, podendo prorrogarse, por acordo das partes mediante a addenda correspondente. Esta addenda terá unha vixencia máxima de catro anos e asinarase antes da finalización do prazo de vixencia do convenio. Non obstante, o convenio poderá denunciarse por calquera das partes; a denuncia deberá realizarse por escrito e con dous meses de antelación á data na que se queira poñer fin á relación entre as partes.

#### **Décimo primeira. Obrigas económicas**

A aplicación deste convenio non conleva ningún tipo de gasto para as partes asinantes do mesmo.

#### **Décimo segunda. Protección de datos**

De conformidade co disposto na Lei orgánica 3/2018, do 5 de decembro, de protección de datos persoais e garantía dos dereitos dixitais, e co Real decreto 1720/2007, do 21 de decembro, polo que se aproba o Regulamento de desenvolvemento da Lei Orgánica 15/1999, de 13 de decembro, de protección de datos de carácter persoal, o alumnado, os centros educativos e a empresa que por razón das actividades previstas neste convenio teñan acceso a datos de carácter persoal, non disporán dos mesmos con finalidade distinta á esixida polas accións formativas.

Neste sentido, haberá que atender ao contemplado no Regulamento (UE) 2016/679 do Parlamento Europeo e do Consello de 27 de abril de 2016 relativo á protección das persoas

físicas no que respecta ao tratamento de datos persoais e á libre circulación de estes datos e polo que se derroga a Directiva 95/46 CE (Regulamento xeral de protección de datos).

**Décimo terceira. Publicidade do convenio, transparencia e bo goberno,**

A firma deste convenio suporá o consentimento expreso do interesado á administración para incluír e facer públicos os datos referidos ao convenio de conformidade co artigo 15 da Lei 1/2016, do 18 de xaneiro, de transparencia e bo goberno, co artigo 8 da Lei 9/2013, do 9 de decembro, (BOE 10-12-2013) de transparencia, acceso á información pública e bo goberno e co Decreto 126/2006, do 20 de xullo, polo que se regula o Rexistro de Convenios da Xunta de Galicia.

**Décimo cuarta. Carácter administrativo do convenio**

O presente convenio de colaboración posúe carácter administrativo por razón do contido e materias sobre as que o mesmo versa, as cales ao abeiro do disposto na Lei 9/2017, de 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014, o exclúen do seu ámbito de aplicación, sen prexuízo da aplicación dos principios desta lei para resolver as lagoas ou dúbidas que a súa aplicación suscite, conforme ao contemplado no artigo 4 da citada lei.

Dada a natureza administrativa deste instrumento xurídico, as controversias ou cuestións litixiosas que puideran xurdir na súa aplicación e non puidesen ser solucionadas no seo da comisión de seguimento, serán resoltas pola xurisdición contencioso-administrativa.

E en proba de conformidade co exposto, ambas as partes firman o presente convenio por triplicado, no lugar e data indicados no encabezamento.

O conselleiro de Cultura, Educación,  
Formación Profesional e Universidades

O Presidente do Cluster del Granito

Román Rodríguez González

Javier Blanco Silva